

REGLUGERÐ

um störf fræðslustjóra.

I. KAFLI

Almenn ákvæði.

1. gr.

Menntamálaráðuneytið setur eða skipar fræðslustjóra að fengnum tillögum fræðsluráðs, sbr. 13. gr. laga nr. 63/1974 um grunnskóla.

2. gr.

Fræðslustjóri er fulltrúi menntamálaráðuneytisins um fræðslumál í fræðsluumdæminu varðandi kennslu- og stjórnunarmál allra skóla sem kostaðir eru sameiginlega af ríki og sveitarfélögum. Hann hefur umsjón með kennslu og skólalaldi í grunnskólum umdæmisins og skal fylgjast með því að fylgt sé lögum, reglum og fyrirmælum um fræðslumál í þessum skólum. Hann hefur í umboði menntamálaráðuneytisins umsjón með eignum og rekstri þeirra skóla sem grunnskólalög taka til, sbr. þó 29. gr. grunnskólalaga.

Fræðslustjóri kannar í samvinnu við skólastjóra, skólalækni og með aðstoð sérfræðiþjónustu fræðsluskrifstofu og annarra hlutaðeigandi aðila, hvort í fræðsluumdæminu séu nemendur, sem vegna fötlunar eða af öðrum ástæðum þurfa á sérkennslu að halda.

Fræðslustjóri er forstöðumaður fræðsluskrifstofu. Hann er ennfremur framkvæmdastjóri fræðsluráðs, sé svo um samið milli fræðsluráðs í umboði samtaka sveitarfélaga í viðkomandi umdæmi og fræðslustjóra, enda komi til samþykki menntamálaráðuneytisins.

Heimilt er fræðslustjóra að semja svo við samtök sveitarfélaga, einstök skólahverfi og sveitarfélög að fræðslu skrifstofa taki að sér tiltekin verkefni fyrir þessa aðila, enda komi full greiðsla fyrir. Á hliðstæðan hátt er fræðslustjóra heimilt að semja svo við samtök sveitarfélaga að skrifstofa þeirra eða einstakar starfsdeildir innan þeirra annist störf fyrir fræðsluskrifstofu, enda komi samþykki menntamálaráðuneytisins til.

3. gr.

Fræðslustjóri skal búsettur þar sem fræðsluskrifstofa umdæmisins er eða í næsta nágrenni.

4. gr.

Fræðslustjóri tekur laun úr ríkissjóði samkvæmt gildandi kjarasamningum. Um kjör fræðslustjóra fer eftir kjarasamningum og lögum um réttindi og skyldur opinberra starfsmanna.

5. gr.

Fræðslustjóri á rétt til setu á fundum fræðsluráðs og hefur þar málfrelsi og tillögurétt. Skylt er formanni fræðsluráðs að boða til fundar ef fræðslustjóri óskar þess.

II. KAFLI

Rekstur fræðsluskrifstofu.

6. gr.

Ríkissjóður greiðir allan kostnað við rekstur fræðslu skrifstofu.

7. gr.

Fræðslustjóri skal árlega gera áætlun um rekstrarkostn að fræðsluskrifstofu fyrir komandi rekstrarár sem er almanaksár.

8. gr.

Fræðslustjóri ræður starfsfólk fræðsluskrifstofu og gerir við það ráðningarsamninga í umboði menntamálaráðuneytisins. Starfsmenn fræðsluskrifstofu eru ríkisstarfsmenn. Um ráðningu og starfskjör þeirra fer eftir lögum um réttindi og skyldur starfsmanna ríkisins.

9. gr.

Fræðsluskrifstofa annast greiðslu launa til þeirra starfsmanna sem ekki taka laun beint úr ríkissjóði.

10. gr.

Fræðslustjóri eða starfsmaður fræðsluskrifstofu í umboði hans annast greiðslur, bókhald og reikningsskil vegna skrifstofunnar.

11. gr.

Reikningar fræðsluskrifstofu skulu endurskoðaðir af ríkisendurskoðun.

III. KAFLI

Samskipti fræðslustjóra og skólanefnda.

12. gr.

Fræðslustjóri á rétt á að sitja fundi skólanefnda í umdæmi sínu með málfrelsi og tillögurétt. Ef fræðslustjóri óskar skal kveðja skólanefnd til fundar enda tilgreini hann hvaða mál hann óskar að leggja fyrir nefndina.

13. gr.

Skólanefnd ber að láta fræðslustjóra í té þær upplýsingar og þá aðstoð sem hann kann að óska svo að hann geti fylgst sem best með skólahaldi í skólahverfinu. Fræðslustjóra ber að leiðbeina skólanefnd eftir því sem hann telur ástæðu til eða hún óskar.

14. gr.

Fræðslustjóri úrskurðar mál sem honum er sérstaklega falið að skera úr, sbr. ákvæði reglugerða og erindisbréfa um einstaka þætti í starfi grunnskólans.

IV. KAFLI

Framkvæmd skólaskyldu.

15. gr.

Fræðslustjóri sér um og hefur eftirlit með framkvæmd skólaskyldu í umdæmi sínu í samvinnu við menntamálaráðuneytið, skólanefndir og skólastjóra.

16. gr.

Óski skólanefnd eftir að nota heimild í 41. gr. laga um grunnskóla um skertan skólatíma skal hún senda fræðslustjóra áætlun um framkvæmd skólahaldsins fyrir 15. mars fyrir hvert komandi skólaár.

17. gr.

Fræðslustjóri lætur fræðsluráði í té umsögn um óskir skólanefnda um að fullnægja með sumarskóla námskyldu barna í 1.-6. bekk grunnskóla.

18. gr.

Fræðslustjóri getur, að höfðu samráði við foreldra eða forráðamenn og skólastjóra, heimilað nemanda að gera eins árs hlé á námi að loknum 8. bekk grunnskóla, enda taki þá nemandinn þátt í atvinnulífi. Lýkur nemandinn þá grunnskólanámi þeim mun síðar. Nemandi, sem hefur gert hlé á námi og tekið þátt í atvinnulífi skv. 1. mgr., á rétt á að þau störf séu metin jafngild hluta af valgreinum 9. bekkjar, enda sanni hann störf sín með fullgildum vottorðum atvinnurekanda. Verði ágreiningur um þessi atriði sker fræðslustjóri úr.

19. gr.

Fræðslustjóri skal, ef skólastjóri óskar þess, leitast við að leysa mál er stafa af óeðlilegum misbresti á skólasókn nemenda. Vilji forráðamaður barns ekki hlíta ákvörðun fræðslustjóra getur hvor aðili um sig vísað málinu til barnaverndarnefndar. Sjá einnig lög nr. 53/1966 um vernd barna og ungmenna með áorðnum breytingum og reglugerð skv. þeim nr. 105/1970.

20. gr.

Fræðslustjóri getur veitt tímabundna undanþágu frá því að barn sæki skóla ef knýjandi ástæður eru fyrir hendi enda mæli skólastjóri og skólanefnd með því að undanþága sé veitt og fylgist með því að barnið stundi nám.

21. gr.

Sé nemandi komið fyrir í skóla í öðru fræðsluumdæmi en lögheimili hans er í og sá skóli getur ekki veitt nemandanum kennslu við hæfi ber skólastjóra að tilkynna það til fræðslustjóra sem tekur málið til úrlausnar.

V. KAFLI

Námsstjórn og námsmat.

22. gr.

Fræðslustjóri hefur með höndum almenna námsstjórn í grunnskólum fræðsluumdæmisins og fylgist með árangri nemenda, hvort tveggja í samráði við skólaþróunardeild menntamálaráðuneytisins.

23. gr.

Verkefni fræðslustjóra varðandi almenna námsstjórn eru m.a. þessi:

- 1) að sjá um að farið sé eftir gildandi námskrám og að skólar starfi tilskilinn tíma,
- 2) að kynna sér aga, stjórn og uppeldisáhrif skóla. Virðist þessum atriðum ábótavant skal fræðslustjóri ræða við skólastjóra, kennara og skólanefnd eftir því sem ástæður þykja til og gera ráðstafanir til úrbóta eftir því sem hann telur fært,
- 3) að fylgjast með að skýrsluhald og skjalavarsla skóla sé í góðu lagi,
- 4) að boða skólastjóra og kennara til fundar þegar honum þykir ástæða til,
- 5) að heimsækja skóla í umdæmi sínu eftir því sem tók eru á og hlýða á kennslu,
- 6) að kynna sér hvernig háttáð er námi þeirra nemenda sem fengið hafa undanþágu frá skólaskyldu, sbr. 19. og 20. gr.

24. gr.

Fræðslustjóri skal hafa eftirlit með námsmati í grunn skóla, sbr. VII. kafla grunnskólalaga.

25. gr.

Fræðslustjóri skipuleggur ferðir fagnámsstjóra menntamálaráðuneytisins í umdæmi sínu í samráði við skólaþróunardeild.

VI. KAFLI

Starfsfólk grunnskóla.

26. gr.

Þegar skólastjóra- eða kennarastaða losnar í skólahverfi ber skólanefnd að tilkynna fræðslustjóra það tafar laust. Fræðslustjóri sendir tilkynninguna til menntamálaráðuneytisins sem auglýsir stöðuna. Skólanefnd veitir viðtöku umsóknum um skólastjóra- og kennarastöður og sendir fræðslustjóra tillögur sínar og umsagnir um umsækjendur. Verði ágreiningur milli skólastjóra og skólanefndar varðandi umsækjendur um kennarastöðu gerir hvor aðili um sig tillögur til fræðslustjóra. Fræðslustjóri sendir tillögur og umsagnir um stöðuveitingar til menntamálaráðuneytisins ásamt umsögn sinni. Forfallist skólastjóri grunnskóla lengur en tvo mánuði og sé enginn yfirkennari við skólann gerir skólanefnd í samráði við skólastjóra og fræðslustjóra tillögu til ráðuneytisins um ráðningu (setningu) í starfið þann tíma sem skólastjóri er forfallaður.

Skólastjóri ræður með samþykki skólanefndar stunda- og forfallakennara sbr. þó lög nr. 48/1986.

27. gr.

Telji skólastjóri að kennari eða kennari að skólastjóri hafi gerst brotlegur við lög þessi eða reglugerðir samkvæmt þeim getur hann vísað málinu til skólanefndar sem beinir því sem skjótast til fræðslustjóra ásamt nauðsynlegum upplýsingum. Nú telur fræðslustjóri að aðgerðir í málinu þoli enga bið og getur hann þá gert tafarlaugar ráðstafanir til úrbóta um stundarsakir en gefur þegar í stað skýrslu til menntamálaráðuneytisins sem tekur ákvörðun í málinu.

28. gr.

Fræðslustjóri úrskurðar ágreiningsefni sem upp kunna að koma milli skólastjóra og kennararáðs og skólanefnd hefur vísað til hans.

29. gr.

Fræðslustjóri gerir tillögur til menntamálaráðuneytisins um trúnaðarmenn til aðstoðar við framkvæmd könnunar prófa. Ennfremur gerir fræðslustjóri tillögur um ráðningu prófdómara til starfa við námsmat í 9. bekk grunnskóla. Fræðslustjóri gerir einnig tillögur til ráðuneytisins um skipun eftirlitsmanna með námsmati skv. 61. gr. grunnskólalaga.

30. gr.

Fræðslustjóri skipuleggur viðræðufundir fyrir nýja kennara og ræður leiðsögukennara þeim til aðstoðar í samræmi við reglur sem menntamálaráðuneytið setur og að fengnum tillögum hlutaðeigandi skólastjóra. Ráðuneytið setur reglur um leiðsögukennara að höfðu samráði við Kennaraháskóla Íslands.

VII. KAFLI

Áætlanagerð, fjármál, skólahúsnæði.

31. gr.

Fræðslustjóri skal safna upplýsingum um skólamál fræðsluumdæmisins að því er varðar skólahúsnæði, aðbúnað skóla og aðstöðu til skólahalds, ennfremur um kennsluhætti, svo og örðugleika við að framfylgja ákvæðum námsskrár um kennslu í grunnskóla.

32. gr.

Menntamálaráðuneytið sendir fræðslustjóra í upphafi hvers árs nauðsynleg gögn og fyrirmæli er varða áætlunargerð vegna fjárlaga. Áætlun fyrir hvert skólahverfi og fræðsluumdæmið í heild sendir fræðslustjóri til menntamálaráðuneytisins á þeim tíma sem það ákveður.

33. gr.

Áætlanargerð vegna fjárlaga skal við það miðuð að í hverjum skóla verði haldið uppi kennslu samkvæmt námskrá og ákvörðun menntamálaráðuneytisins um skiptingu kennslustunda milli námsgreina í 1.-9. bekk grunnskóla, sbr. einnig 46.-48. gr. laga um grunnskóla.

Ef þörf krefur skal fræðslustjóri endurskoða áætlanir samkvæmt þessari grein við upphaf skólaárs.

34. gr.

Nú eru fyrirsjáanlegar breytingar á skólahaldi í einu eða fleiri skólahverfum fræðsluumdæmisins síðari hluta næsta almanaksárs (þ.e. fyrri hluta næsta rekstrarárs) eftir að áætlanir eru gerðar og skal þá fræðslustjóri láta fylgja áætlununum til ráðuneytisins greinargerð um breytingar ef ætla má að þær hafi í för með sér kostnaðarbreytingar svo að nokkru nemi.

35. gr.

Fræðslustjóri krefur sveitarfélög um endurskoðaða rekstrarreikninga grunnskóla fyrir 1. júní ár hvert.

36. gr.

Fræðslustjóri fylgist með skipulagi og framkvæmd skólaaksturs.

37. gr.

Telji fræðslustjóri skólahúsnæði ófullnægjandi gerir hann tillögur um úrbætur á því til hlutaðeigandi skólanefndar og sveitastjórnar, svo og til menntamálaráðuneytisins.

38. gr.

Nú hyggjast tvö eða fleiri sveitarfélög byggja saman skólamannvirki og skal fræðslustjóri þá veita aðstoð við samninga um skiptingu stofnkostnaðar sé þess óskað.

39. gr.

Fræðslustjóri skal hafa eftirlit með því að ráðstöfun á skólahúsnæði brjóti ekki í bága við notkun húsnæðisins til skólahalds.

40. gr.

Fræðslustjóri skal fylgjast með því að vinnuframlag þeirra starfsmanna skóla sem ráðnir eru af ríkinu og launa uppgjör við þá sé í samræmi við gildandi kjarasamninga og túlkun launaskrifstofu ríkisins á þeim.

VIII. KAFLI

Sérfræðiþjónusta fræðsluskrifstofu.

41. gr.

Ráðgjafar- og sálfræðiþjónusta skóla er sérfræðileg deild í fræðsluskrifstofu og lýtur stjórn fræðslustjóra, sem skipuleggur störf deildarinnar. Í þeirri skipulagningu felst m.a. ákvarðanatáka um daglega starfshætti, heimsóknir í skóla, forgangsroðun verkefna, skýrslugerð o.fl.

42. gr.

Fræðslustjóri kemur á og hefur umsjón með kennslufræðilegri þjónustu fyrir fræðsluumdæmið, bæði á sviði almennrar kennslu og sérkennslu.

IX. KAFLI Ýmis ákvæði.

43. gr.

Skólastjórar grunnskóla skulu árlega gera fræðslustjóra grein fyrir hversu háttað var tólmstunda- og félagslífi í skóla þeirra á næstliðnu skólaári.

44. gr.

Fræðslustjóri fylgist með skipulagi og framkvæmd heilsuverndar í grunnskólum í sínu umdæmi.

45. gr.

Vísi skólastjóri nemanda úr skóla um stundarsakir skal hann tafarlaust tilkynna fræðslustjóra þá ákvörðun og hvaða orsakir lágu til hennar. Fræðslustjóri tekur þá málið til meðferðar samkvæmt 54. gr. grunnskólalaga í samræmi við reglugerð nr. 512/1975 um skólareglur o.fl. í grunnskóla.

46. gr.

Fræðslustjóri fylgist með störfum einkaskóla í umdæmi sínu skv. 75. gr. grunnskólalaga.

47. gr.

Fræðslustjóri semur árlega og sendir ráðuneytinu skýrslu um störf sín á liðnu ári.

48. gr.

Reglugerð þessi, sem sett er samkvæmt heimild í 84. gr. laga nr. 63/1974 um grunnskóla, sem breytt var með lögum nr. 87/1989 um breytingu á verkaskiptingu ríkis og sveitarfélaga, öðlast gildi 1. febrúar 1990.

Menntamálaráðuneytið, 26. janúar 1990.

Svavar Gestsson.

Sólrún Jensdóttir.

AUGLÝSING

**um breytingu á gjaldskrá Rafmagnsveitna ríkisins,
nr. 430, 22. september 1989.**

VI. kafli, Niðurgreiðslur og sérstakur afsláttur, breytist og orðist svo:

NIÐURGREIÐSLUR OG AFSLÁTTUR

Iðnaðarráðuneytið ákveður upphæð niðurgreiðslna á raforku til hitunar íbúðarhúsnæðis og setur nánari reglur þar um. Niðurgreiðslna njóta þau heimili sem búa við rafhitun og eiga ekki kost á heitu vatni til upphitunar frá hitaveitu sem starfrækt er á viðkomandi stað.

Rafmagnsveitur ríkisins veita ennfremur fyrst um sinn, sérstakan afslátt til sömu aðila og njóta niðurgreiðslna. Um niðurgreiðslur og sérstakan afslátt gilda eftirfarandi reglur: